

2 Per troq liq

Awg meh he lehq phehq peg che awg lawn

Liq che ve haq haq yug che chaw teq pa vawr,
 1 Per troq liq haq gha haq yug che chaw teq pa
 teq mor-a lehax yaog. Ma hez hez che sar lar teq
 pa kaod soq saq vid che haq te lehq, kuhz tuq ir
 jad che awg yand khuhn i hehd teq pa gha chehd
 chehd che yaog.

Buhq var he lehq buhq che awg yand

Liq che te koz haq buhq var yawd awg ton
 vawr Sid mor Per troq lehd koz che yaog. Kheh
 te lehq, 1 Per troq liq haq haq yug par u ve teq
 mor haq buhq vid lar che yawd ved liq ni koz te
 koz phehq che yaog lehd yawd koz lar che yaog
 (3:1). Kheh te lehq Pawd loq haq liz, “A nig haq
 che a nax var,” lehd koz lar che yaog (3:15). Liq
 buhq che awg khad liz Per troq buhq lar che lehd
 koz che haq hawnr daq che yaog. Liq che ve te
 koz haq A.D. 66 khuhq thad huh buhq lar che
 yaog.

*A yed ir che awg lawn he lehq awg lawn kha
 peg*

Per troq yawd Khreq ve “yawg huhnx var”
 phehq che haq te lehq ma hez hez che sar lar
 teq pa he lehq haeg che haq te che chaw teq pa
 Khreq yad awg mor khuhn ca khuhd gehag che
 awg lawn haq duhd har duhd khix jad che yaog.
 Kheh te lehq ma hez hez che sar lar che teq pa
 haq khawd-ehg kheh te tawr daq gha tug, yawd

Khreq yad awg mor haq mar vid che yaog. Lex lehq, i hehd haq awg bon cawg jad che Khreq yad ve yonr khad nux he lehq daq che a saq teq khad awg lawn liz, yawd mar vid lar che yaog. Jawd mawd Yer suq Khreq vawr, awg cehg mag ni pawz te pawz kawq yaq tug yaog. Kheh te cheaq te lehq, yonr che chaw teq pa sa tiq tar che khuhn ghu lar hehnd lar cawd che yaog.

Awg lawn nux

1. Awg kawd ve tawd (1:1-2)
2. Khreq yad te pa ve daq che awg lid awg khad khuhn ir lag muh lag che (1:3-11)
3. Per troq sir vid gad che awg lawn (1:12-21)
4. Ma hez hez che sar lar teq pa awg lawn haq sa tiq pid che (2:1-22)
5. Jawd mawd Yer suq Khreq ni pawz te pawz kawq yaq tug awg lawn (3:1-16)
6. Awg leh med ve tawd (3:17-18)

Awg chawd teq pa haq duhd nuhd che tawd

¹ Ngag awr Lehr, Yer suq Khreq ve awg ceg he lehq cuh yad Sid monr Per troq* yaog. Ngag nig hehd haq liq che buhq fea che yaog. A nig ved Ghig sa he lehq Thaer khuhq par Yer suq Khreq ve thed che cawd che haq te lehq nig hehd gha lar che yonr che awr Lehr, ngag hehd yonr che heh phehq che yaog. ² Ghig sa he lehq a nig ved Jawd mawd Yer suq haq sir che awg khuhn, awg bon awg sinx he lehq duhd sa gad sa che nig hehd awg khod-aq mad-ag vid-oq.

* **1:1** 1:1 Sid monr Per troq Mt 16:18, Yh 1:42, 1Pt 1:1 haq ngawx.

Ghig sa ni ma tar che heh gha tar che awg lawn

³ A nig co ha teq lehq Ghig sa haq yawz yan gha tug, Ghig sa yawd ved kand pax a nig haq kha lor che awg gha lia pehar vehor. Yawd che kheh te che awr Lehr, a nig yawd haq sir che haq cud lehq te lar che yaog. Yawd ved awg mig awg phond he lehq peh lawq jad che haq te lehq, a nig haq yawd kug yug lar peor.[†] ⁴ Awg ceng che teq pa haq te lehq, yawd ved awg phuhd khaz jad lehq ir jad che kar tiq[‡] teq pa liz, a nig haq pehar vehor. Kar tiq u ve teq pa haq te lehq Ghig sa phehq che heh nig hehd liz phehq gha lehq, mig gig khod-aq lo awg suhr awg sar a lor haq te lehq lug che sez che haq nig hehd pong tug yaog.

⁵ Kheh te cheaq te lehq, hax ceh nux cud cad lehq nig hehd yonr che[§] ted ceng awg thang, daq che awg lid cawg vid-oq. Daq che awg lid* awg thang, cud yiq cawg vid-oq. ⁶ Cud yiq cawg che awg thang, a sug yawd awg ton haq ghad vix che ted ceng cawg vid-oq. A sug yawd awg ton haq ghad vix che awg thang, yeg khanr vix che ted ceng cawg vid-oq. Yeg khanr vix che awg thang, Ghig sa haq yawz yan vix che ted ceng cawg vid-oq. ⁷ Ghig sa haq yawz yan vix che awg thang, a vix a nax haq haq lehq ngawx haq sax daq che ted ceng cawg vid-oq. A vix a nax haq haq

[†] **1:3** 1:3 kug yug lar peor Yawd ved yad phehaq tug lez yug che haq koz che yaog. [‡] **1:4** 1:4 ir jad che kar tiq Ghig sa ve muhd mig khuhn co co taer taer gha chehd tug haq koz che yaog. 1:11

[§] **1:5** 1:5 yonr che Yer suq haq sir lehq haq yug che haq koz che yaog. * **1:5** 1:5 Daq che awg lid Khreq yad awr Lehr daq che awg lid khuhn a saq gha teq che yaog.

lehq ngawx haq sax daq che awg thang, haq daq pehnd daq che[†] cawg vid-oq. ⁸ Awg lawn ghod ver, awg ceng che teq pa nig hehd awg khuhn cawg lehq mad-ag ver, a nig ved Jawd mawd Yer suq Khreq haq sir che awg khuhn, nig hehd awg bon cawg che chaw phehq lehq, awg sir kha peh nuhaq tug[‡] yaog. ⁹ Awg ceng che teq pa mad cawg che chaw awr lehr, mehz cox var heh§ te lehq, mehz khoq haq lehax mawg gha che yaog. Yawd ved vend bax awg pir teq pa haq Ghig sa chuhd phu chuhd kehg vid che haq yawd lend vehr che yaog.

¹⁰ Kheh te cheaq te lehq a vix a nax teq paog, Ghig sa nig hehd haq kug yug lez yug lar che ted ceng awr lehr, awg cehg mag yeg che yaog lehz sir gha tug hax ceh nux teo. Che kheh te ver, nig hehd te pawz-a liz ma kuhd tug yaog. ¹¹ Kheh te lehq, a nig ved Jawd mawd he lehq Thaer khuhq par Yer suq Khreq ve co co taer taer che muhd mig awg khuhn Ghig sa nig hehd haq ha lehg che awg khuhn haq yug ve gehe tug yaog.

¹² Kheh te cheaq te lehq, che teq pa* haq nig hehd sir lehq gha hend lar che thed che cawd che tawd khuhd awg khuhn nig hehd chehd yeg chehd liz, ngag duhd chez lehq awg ceng che teq pa haq khar thad liz nig hehd haq duhd nuhd vid

[†] **1:7** 1:7 haq daq pehnd daq che Chaw awg gha lia haq liz gha haq che haq koz che yaog. Yh 10:15 [‡] **1:8** 1:8 awg sir kha peh nuhaq tug Co ha phawd ir lag che haq koz che yaog. Gal 5:22

[§] **1:9** 1:9 mehz cox var heh Khreq yad ve awg lid awg khad haq maq sir che haq koz che yaog. 1Yh 2:11 * **1:12** 1:12 che teq pa Ghig sa ve cuh kar var teq pa pheq mar ax che tawd haq koz che yaog. 1:5-7

tug yaog. ¹³ Awg ceng che teq pa haq nig hehd maq gha lend vehr tug, ngag awg ton teq chehd che kkeh ceh, nig hehd haq duhd nuhd vid tug te che awr lehr cawd che yaog lehz ngag sawnr lar che yaog. ¹⁴ Awg lawn ghod ver, a nig ved Jawd mawd Yer suq Khreq ngag haq pheq mar lar che heh, maq muh tand ngag ved awg ton che haq gha chid bag lar haz tug[†] ngag sir che yaog. ¹⁵ Mig gig khod-aq lo ngag tuhz veh peg khaz nuhr liz, che teq pa haq nig hehd khar thad liz duhd nuhd tug, a meha ngag hax ceh nux te tug yaog.

Yer suq ve awg mig awg phond haq gha mawg che awg lawn

¹⁶ Awg lawn ghod ver, a nig ved Jawd mawd Yer suq Khreq ve kand pax awg lawn he lehq yawd kawq yaq tug awg lawn ngag hehd nig hehd haq koz mar ax che te yand, cud yiq haq yehd lehq ca duhd koz che kad phed kad lao khuhd lehax phehq che ma hez. Kkeh ma khuhd, ngag hehd awr lehr yawd ved ir jad che awg mig awg phond haq mehz sir gha mawg che[‡] chaw phehq che yaog. ¹⁷ Awr pa Ghig sa yawd haq tar ir tar muh lehq awg mig awg phond pid che haq ngag hehd gha mawg che yaog. Chaw cheawg lehr, ngag haq jad che Yad phu yaog. Yawd haq ngag ni ma cawd jad che yaog lehz, Awg mig awg phond kha peh cawg Sehr phad yawd haq che kkeh koz

[†] **1:14** 1:14 awg ton che haq gha chid bag lar haz tug Yawd gha suh tug haq koz chehd che yaog. [‡] **1:16** 1:16 mehz sir gha mawg che Yer suq ve awg hoq awg han pa che haq gha mawg che haq koz che yaog. Yh 21:18-19

vid che tawd khuhd haq ngag hehd gha kad che yaog. ¹⁸ Daq kehg che keh u ve ted dig awg thang huh yawd geh chehd che te yand, tawd khuhd u ve muhd nuh maq lo tuhaz che haq ngag hehd gha kad che yaog.

¹⁹ Che haq te lehq, awg kawd thad loar koz teh lar che Ghig sa ve cuh kar var teq pa ve tawd khuhd haq a nig lex lehq yonr gha che yaog. Nig hehd ve ni ma awg khuhn muhd thid-ag lehq[§] pheq meg ma tuhaz* thad kha gag, naz hoq che awg khuhn awg ghiz pawd chehd che a mir khehd haq cud che heh te lehq, Ghig sa ve cuh kar var teq pa ve tawd haq kha nehax na yug cawd che yaog. ²⁰ Liq phu khuhn cawg che Ghig sa ve cuh kar var ve tawd, khar ve te khuhd lehd ma koz, a sug yawd khad yawd cuhx kig haq duhd tuhaz che ma hez lehz awg kawd sir-oq. ²¹ Awg lawn ghod ver, Ghig sa ve cuh kar var teq pa awr lehr, i hehd khad i hehd ve a lor haq te lehq yaw che ma hez. Khehd ma khuhd, Daq che kehg che Awg ha phu i hehd haq duhd pawnr vid lehq,[†] i hehd Ghig sa ve tawd khuhd kawq yaw che yaog.

2

Ma hez hez che sar lar he lehq ma hez hez che cuh kar var teq pa awg lawn

§ **1:19** 1:19 muhd thid-ag lehq Ghig sa uq penr che awg ni gag che haq koz che yaog. 1K 15:22-18 * **1:19** 1:19 pheq meg ma tuhaz Yer suq haq koz gad che yaog. Pheq 2:28, 22:16 † **1:21** 1:21 duhd pawnr vid lehq 2Ti 3:16 haq ngawx.

¹ Kheh ma khuhd, Yud daq chaw awg khuhn ma hez hez che cuh kar var* teq pa tuhaz jaw che heh, nig hehd awg khuhn liz ma hez hez che sar lar teq pa tuhaz tug yaog. I hehd awr lehr, te lug te sez vix che ma hez hez che yonr khad teq pa haq nig hehd awg khuhn khuhd yug ke tug yaog. I hehd haq vig yug vehr che Awg Jawd mawd haq liz chid bag lar haz lehq, a sug yawd awg ton har naq lug veh sez veh tug, i hehd te che yaog. ² Chaw laex ghad i hehd ve chaq chiz che awg lid awg khad haq kae tug yaog. I hehd haq te lehq, awg cehg mag cawd che yaq kaw[†] haq su maq sawnr ma caz koz tug yaog. ³ I hehd awr lehr, med nged jeg kor haq sex lae jad che haq te lehq, a sug yawd awg pun awg bon tuhaz tug[‡] lehax nig hehd haq her ka tug yaog. Kheh ma khuhd, a mig thad lo liz Ghig sa i hehd haq suhx taz chez lar che awr lehr, kheha te tug ma hez. I hehd awg cehg mag lug veh sez veh tug yaog.

⁴ Awg lawn ghod ver, vend bax te che muhd nuh maq cuh yad teq pa haq liz Ghig sa mad pong vid. Kheh ma khuhd i hehd haq muhd naz hoq[§] awg khuhn chid bag ke lehq, suhx jehg che awg ni gag thad kha gag, naz hoq jad kig huh i hehd haq son caz pheh lehq ke huh lar che yaog.

* **2:1** 2:1 ma hez hez che cuh kar var 2Jm 18:19, Isy 9:13-17, Yrm 5:31, 14:14 † **2:2** 2:2 awg cehg mag cawd che yaq kaw Khreq yad a saq teq khad haq koz che yaog. Cy 9:2, 24:14 ‡ **2:3** 2:3 awg bon tuhaz tug A sug yawd ved ux peg awg pun lehax te che haq koz che yaog. § **2:4** 2:4 muhd naz hoq Maq yonr che chaw haq awg leh med cir yanr vid kig phehq che yaog. Mt 5:22

⁵ A mig thad lo ve mig gig yad* teq pa haq liz Ghig sa mad pong vid lehq yawd haq ma yawz yan che chaw yad teq pa haq Ghig sa a kaz thunr vehr vid che yaog. Kheh ma khuhd, thed che cawd che awg lawn haq bon mar par Nod ar he lehq yawd geh chaw suhr ghad haq lehax Ghig sa pong vid che yaog. ⁶ Sawd donr med he lehq Kawd mod raq† med haq liz, Ghig sa cir yanr lehq khuhq ha phehaq vid che yaog. Yawd u kheh te cir yanr vid che awr lehr, awg khaz nuhr lag tug ve yawd haq ma yawz yan che chaw yad teq pa awg pun hend kig jawg kig teh lar che yaog. ⁷ Kheh ma khuhd, thed che cawd che Lawd tar te ghad haq yawd pong vid che yaog. Chaw haeg teq pa chaq chiz che awg lid awg khad‡ haq te che haq te lehq, Lawd tar awr lehr duhd har gad har jad che yaog. ⁸ (Awg lawn ghod ver, thed che cawd che chaw u ve te ghad awr lehr, med yad u ve teq pa geh ni gha lia chehd che te yand, i hehd ve haeg che kanx haq gha mawg gha kad che haq te lehq, yawd ved thed che cawd che ni ma awg khuhn tuq khanr jad che yaog.) ⁹ Kheh te cheaq te lehq Ghig sa haq yawz yan che chaw teq pa awr lehr, ber che lawd che haq gha phud che te yand, i hehd haq khawd-ehg kheh te pong vid tug, Jawd mawd Ghig sa sir che yaog. Kheh te lehq suhx jehg suhx taz che awg ni gag thad kha gag, ma thed ma cawd che chaw teq pa haq khawd-ehg

* ^{2:5} 2:5 A mig thad lo ve mig gig yad Nod ar awg coaq thad ve chaw haq koz che yaog. † ^{2:6} 2:6 Sawd donr ... Kawd mod raq Khiz 19 haq ngawx. ‡ ^{2:7} 2:7 chaq chiz che awg lid awg khad Hax chawd hax paz te che haq koz che yaog.

kheh te cir yanr don chehd vid tug liz yawd sir che yaog. ¹⁰ Chaq chiz che awg khuhn awg suhr awg sar a lor§ awg khad haq te kae lehq jawd mawd teq pa awg huhx ma chehd gad che chaw teq pa haq lex lehq cir yanr vid tug yaog.

Ma hez hez che sar lar che teq pa awr lehr, ni ma ir lehq a cehax liz ma kuhz vix che khuhn awg mig awg phond ir che awg ceng teq pa haq maq sawnr ma caz koz tug i hehd ma kuhz. ¹¹ Muhd nuh maq cuh yad teq pa awr lehr, chaw che teq pa haq keh awg ghad he lehq kand pax ir liz, Jawd mawd Ghig sa mehz khuhd suhr i hehd haq maq sawnr ma caz koz che awg khuhn suhx mad jehg ma taz vid. ¹² Chaw che teq pa awr lehr, pheh yug lehq dawz vehr tug awg pun pawag che, ma duhd sir vix lehq awg suhr awg sar a lor haq lehax te che to nud to saz heh phehq che yaog. I hehd maq sir che awg ceng teq pa haq liz maq sawnr ma caz koz che yaog. I hehd awr lehr to nud to saz heh te lug veh sez veh lehq, ¹³ haeg che kanx teq pa haq te che awg phuhd, lug che sez che haq gha khanr tug yaog. I hehd awr lehr, muhd kaw maq thad liz te pong te lex thi cad thi dawg lehq juhg buhz ka buhz che haq ha lehg tug phehq che yaog lehz sawnr che yaog. Nig hehd geh teq geha pawehd caor cad chehd liz, nig hehd haq her ka lehq ha lehg tug awg pun khar thad liz chaq chiz che haq te pong te lex chehd che yaog. I hehd awr lehr, nig hehd ve awg ton haq cawg chehd che chaq chiz che awg kix awg hawehd phehq che heh yaog. ¹⁴ I hehd

§ **2:10** 2:10 awg suhr awg sar a lor Hax chawd hax paz te che haq koz che yaog.

ve mehz sir awr lehr, khar thad liz hax chawd hax paz te che chaw teq pa haq lehax ca ngawx che yaog. I hehd vend bax te che ted ceng haq ma buhz vix. Ni ma mad yeg che chaw teq pa haq beg yug lehq, su ved med nged jeg kor haq sex lae vix jad che yaog. I hehd awr lehr, Ghig sa khen lar che awg yad awg dug phehq che yaog. ¹⁵ Thed che yaq kaw haq i hehd chid bag lar haz lehq yaq kaw yaq vehr che yaog. Bawx sawr ve yad Bar lanr* ve yaq kaw awg khad haq i hehd ghaq veh che yaog. Bar lanr u ve te ghad awr lehr, haeg che kanx awg phuhd haq sex lae lehq, ¹⁶ yawd ved vend bax haq te lehq ded mar che haq yawd gha khanr che yaog. Khawd-ehg kheh te le lehd koz ver, tawd maq yaw vix che pix lar teq kheh awr lehr, chaw yad heh te lehq tawd yaw lehq, cuh kar var Bar lanr ghud che haq tawr lar che yaog.

¹⁷ Chaw u ve teq pa awr lehr, a kaz fir vehr che kaz khuh heh te lehq, muhd huh nux mez chid ve che mog heh te che yaog. I hehd awg pun naz tud jad che chehd kig ghu teh lar vehr che yaog. ¹⁸ Awg lawn ghod ver, awg bon mad cawg che tawd ir tawd muh teq pa haq i hehd yaw che yaog. Yaq kaw yaq che khuhn chehd chehd che chaw teq pa awg khuhn pong tuhaz suhx suhax te che[†] chaw teq pa haq, awg suhr awg sar a lor te pong te lex che ted ceng haq i hehd yehd lehq kawq beg yug che yaog. ¹⁹ Nig hehd su awg ceg maq gha kawq te tug yaog lehd i hehd su haq kar

* ^{2:15} 2:15 Bar lanr Heh 22:4-35 haq ngawx. † ^{2:18} 2:18 pong tuhaz suhx suhax te che Khreq yad phehaq suhx suhax te che chaw haq koz che yaog.

tiq pid liz, i hehd awg ton awr lehr lug che sez che ted ceng awg huhx lo awg ceg te chehd che yaog. Awg lawn ghod ver, chaw yad haq ghad che khar ve ted ceng lehd ma koz, chaw yad awr lehr u ve awg huhx lo awg ceg te che yaog. ²⁰ A nig ved Jawd mawd he lehq Thaer khuhq par Yer suq Khreq haq i hehd sir che haq te lehq, mig gig ve chaq chiz che teq pa haq gha pong vehr khaz nuhr, chaq chiz che awg khuhn i hehd te pawz kawq gehe khanx chehd[‡] lehq, chaq chiz che u ve i hehd haq ghad ver, awg leh med phehaq che awr lehr awg kawd maq thad phehq che haq keh jad tug yaog. ²¹ Awg lawn ghod ver, i hehd awg pun thed che cawd che yaq kaw haq maq sir che awr lehr, sir vehr lehq i hehd haq pid lar che daq che kehg che awg lid tawd khuhd haq kawq phuhz kuhq lar haz che haq keh daq che yaog. ²² [†]Phid ted ceng awr lehr pheq kha lar che haq kawq ghawz cad lehq, vaq ted ceng awr lehr yawd haq a kaz chuhd vid peg khaz nuhr yawd khad yawad chehz nehz kawq hehnx che yaog lehd koz lar che chaw mawd khuhd che te khuhd awr lehr, i hehd te che haq cawd daq jad che yaog.

3

Jawd mawd Yer suq kawq yaq tug awg lawn

¹ Haq che chaw teq paog, ngag nig hehd haq buhq fea che liq cheawg lehr, ni koz te koz yaog.

[‡] **2:20** 2:20 khanx chehd Khreq yad phehq vehor awg khaz nuhr, vend bax khuhn kawq ce veh che haq koz che yaog. Mt 12:45

[†] **2:22** 2:22 Tawd 26:11

Liq che ve ni koz awg khuhn, nig hehd thed-e
 ghad cawd-aw ghad duhd ngawx vix tug, duhd
 nuhd fea che haq cud lehq ngag nig hehd haq
 awg ghad pehar che yaog. ² Pong lag thad Ghig
 sa ve daq kehg che cuh kar var teq pa koz lar
 che tawd khuhd teq pa haq duhd nuhd tug, ngag
 nig hehd haq duhd nuhad che yaog. Kheh te lehq
 Jawd mawd he lehq Thaer khuhq par nig hehd ve
 cuh yad* teq pa haq cud lehq pid lar che tawd
 khuhd teq pa haq liz ngag nig hehd haq kawq
 duhd nuhad che yaog. ³ Awg kawd sir cawd che
 ted ceng awr lehr che kheh yaog. Awg leh med
 ve awg yand awg khuhn, su haq tar nehg lehq
 kaod koz gid ghig gid che chaw teq pa tuhaz tug
 yaog. I hehd awr lehr, nig hehd haq kaod koz
 gid ghig gid lehq awg suhr awg sar ve a lor awg
 khad haq kae tug yaog. ⁴ I hehd che kheh koz
 tug yaog. Jawd mawd Yer suq kawq yaq tug lehd
 koz lar che kar tiq tawd khuhd khawd-ehg kheh
 vawr le. A pux a pi teq pa[†] suh vehr che teq ni
 haq tanr lehq yaq ni kha gag awg ceng gha lia
 liz mig gig te phanr che thad haq kha sur suar te
 chehd che ma hez hawg la lehd koz tug yaog. ⁵ A
 mig thad lo liz Ghig sa ve tawd khuhd haq te lehq
 muhd nuh maq cawag che haq i hehd ma duhd
 nuhd gad. Kheh te lehq, Ghig sa ve tawd khuhd
 haq te lehq, a kaz awg khuhn mig gig tuhaz lehq,
 a kaz haq te lehq mig gig phehaq che haq liz i
 hehd maq sir gad che yaog. ⁶ Awg yand u ve

* **3:2** 3:2 nig hehd ve cuh yad Yer suq lez yug lar che awg laq
 ghuhd teq pa haq koz che yaog. † **3:4** 3:4 A pux a pi teq pa
 Awg kawd ped maq ve bon hox bon nax teq pa haq koz che yaog.
 He 13:7

khuhn, mig gig haq a kaz thunr vid lehq,[‡] chaw yad teq pa haq te lug te sez vid che yaog. ⁷ Ghig sa ve tawd khuhd u ve haq te lehq a meha cawg lar che muhd nuh maq he lehq mig gig awr lehr a mir tox bag tug awg pun teh lar che yaog. Tawd khuhd che haq te lehq muhd nuh maq he lehq mig gig awr lehr, Ghig sa haq ma yawz maq yan che chaw teq pa haq suhx jehg lehq te lug vid che teq ni gag thad kha gag teha lar che yaog.

⁸ Haq che chaw teq paog, che te ceng haq nig hehd ta lend. Jawd mawd Ghig sa awr lehr, teq ni haq teq hinx khuhq heh sawnr lehq, teq hinx khuhq haq teq ni heh sawnr che yaog. ⁹ Jawd mawd Ghig sa kar tiq te lar che heh phehaq vid tug yawd jo jad law lehz chaw ted pehg pehar duhd che yaog. Kheh ma khuhd, kar tiq haq phehaq vid tug yawd jo che ma hez. Chaw awg gha lia vend bax haq duhd phuhz lehq te ghadeg liz maq gha lug vehr tug yawd he gad che haq te lehq, yawd nig hehd haq yeg khanr chehd che yaog.

¹⁰ Chaw khuhd chaw naz lag che heh te lehq, Jawd mawd Yer suq ve awg ni[§] lag gag tug yaog. U ve teq ni awg khuhn, muhd nuh maq awr lehr awg khuhd pehz hehnd mehz te lehq mehx vehr tug yaog. Muhd nuh maq lo cawg che awg ceng awg gha lia a mir chiz jad lehq kig vehr tug yaog. Mig gig he lehq mig gig awg thang huh kha te lar che kanx awg gha lia haq a mir toq bag tug yaog. ¹¹ Awg ceng gha lia che teq pa che kheh te kig

[‡] **3:6** 3:6 a kaz thunr vid lehq Khiz 6:17, 7:21-22 haq ngawx.

[§] **3:10** 3:10 Yer suq ve awg ni Yer suq kawq yaq tug awg ni haq koz che yaog. 1 Th 5:2

vehr tug haq te lehq, nig hehd awr Lehr daq kehg che awg lid awg khad haq lehax te lehq Ghig sa haq yawz yan che chaw te kenr te cawd che ma hez hawg la. ¹² Nig hehd Ghig sa ve awg ni* lag che haq law lar lehq cud cad che khuhn duhd law chehd huh, u kheh te che chaw phehaq cawd che yaog. Awg ni u ve haq te lehq, muhd nuh maq haq a mir toq bag lehq mehx vehr lehq, muhd nuh maq lo cawg che awg ceng awg gha lia a mir chiz jad lehq kig vehr tug yaog. ¹³ Kheh ma khuhd, Ghig sa yawd kar tiq cawg lar che heh, muhd nuh maq awg suhx† he lehq mig gig awg suhx cawag tug haq a nig duhd law chehd che yaog. U huh thed che cawd che ted ceng cawg tug yaog.

¹⁴ Kheh te cheaq te lehq haq che chaw teq paog, nig hehd awg ceng che teq pa haq duhd law chehd che haq te lehq, yawd mehz khuhd suhr huh chaq chiz che he lehq awg kix awg hawehd maq gha cawg tug he lehq duhd sa gad sa che ni ma gha cawg tug, cud cad lehq teo. ¹⁵ A nig ved Jawd mawd Yer suq yeg khanr che awr Lehr, chaw yad thaer khuhq che haq gha tug awg pun yeg khanr chehd che lehd duhd-oq. Awg lawn che teq pa awr Lehr, ngag hehd haq che a vix a nax Pawd loq liz, yawd gha lar che cud yiq haq cud lehq nig hehd haq liq buhq fea vehr che heh yaog. ¹⁶ Yawd ved liq awg gha lia awg khuhn awg lawn che teq pa haq yawd buhq lar che yaog.

* **3:12** 3:12 Ghig sa ve awg ni Ghig sa suhx jehg che awg ni haq koz che yaog. Mt 25:13, 1 Th 5:6 † **3:13** 3:13 muhd nuh maq awg suhx Isy 65:17, 66:22, Pheq 21:1 haq ngawx.

Liq u ve teq pa awg khuhn sir gha tug har jad che awg lawn[‡] ted pehg pehar liz cawg che yaog. Cud yiq mad lawq lehq ni ma mad yeg vix che chaw teq pa awr lehr, awg kag awr ve Liq phu tawd khuhd teq pa haq i hehd yug phuhz che heh, har jad che yawd ved tawd khuhd u ve teq pa haq liz yug phuhz che yaog. I hehd che kheh te che awr lehr, i hehd awg ton gha lug gha sez tug awg pun yaog.

¹⁷ Kheh te cheaq te lehq haq che chaw teq paog, awg lawn che ve haq awg kawd thad loar nig hehd sir lar peg che haq te lehq, haeg che chaw[§] che teq pa ve te yaq che awg khad haq cud lehq nig hehd haq i hehd maq gha seh kae lehq nig hehd ni ma yeg che ted ceng liz maq gha lug veh tug, sa tiq tar-oq. ¹⁸ A nig ved Jawd mawd he lehq Thaer khuhq par Yer suq Khreq ve awg bon awg khuhn he lehq yawd haq sir che ted ceng awg khuhn, khar thad liz nig hehd ir lag vid-oq. A meha liz te lehq co co taer taer yawd haq chid ir chid muh vid-oq. A meng.

[‡] **3:16** 3:16 sir gha tug har jad che awg lawn Cuhx kig nax che haq koz che yaog. [§] **3:17** 3:17 haeg che chaw Ma hez hez che Sar lar haq koz che yaog. 2:1-3

**Lad hur Si Liq Phu Awg Suhx
Lahu Shi: Lad hur Si Liq Phu Awg Suhx New
Testament**

copyright © 2015 Wycliffe Bible Translators, Inc.

Language: Lahu Si

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

e3f23237-3165-58f9-84d8-20fb5acd84fe